


夢

梁

錄

一



叢書集成初編所選學海類
編知不足齋叢書學津討原
皆收有此書學津本從宋本
抄錄有明都穆清錢曾及張
鳳池等跋故據以排印

四庫全書提要

夢梁錄二十卷。宋吳自牧撰。自牧錢塘人。仕履未詳。是書全仿東京夢華錄之體。所紀南宋郊廟宮殿。下至百工雜戲之事。委曲瑣屑。無不備載。然詳於敘述。而拙於文采。俚詞俗字。展笈紛如。又出夢華錄之下。而觀其自序。實非不解雅語者。毋乃信劉知幾之說。欲如宋孝王關東風俗傳。方言世語。由此畢彰乎。案語見史通言語篇。要其措詞質實。與武林舊事詳略互見。均可稽考遺聞。亦不必責以詞藻也。自牧自序云。緬懷往事。殆猶夢也。故名夢梁錄。末署甲戌歲中秋日。考甲戌爲宋度宗咸淳十年。其時宋尙未亡。不應先作是語。意甲戌字傳寫誤歟。王士禎漁洋文略有是書跋云。夢梁錄二十卷。不著名氏。蓋士禎所見鈔本。又脫此序。故不知爲自牧耳。今檢永樂大典所引。條條皆題自牧之名。與此本相合。知非影附古書。僞標撰人姓氏矣。

夢梁錄序

昔人臥一炊頃而平生事業、數歷皆遍。及覺則依然故吾。始知其爲夢也。因謂之黃梁夢。矧時異事殊。城池苑囿之富、風俗人物之盛、焉保其常如疇昔哉。緬懷往事。殆猶夢也。名曰夢梁錄云。脫有遺闕。識者幸改正之。毋哂甲戌歲中秋日。錢塘吳自牧書。

夢梁錄目錄

卷一

正月

元旦大朝會

立春

元宵

車駕詣景靈宮孟襲

二月

八日祠山聖誕

二月望

卷二

三月佑聖真君誕辰附

諸州府得解士人赴省闈

蔭補未仕官人赴銓

夢梁錄目錄

清明節

諸庫迎煮

州府節制諸軍春教

二十八日東嶽聖帝誕辰

暮春

卷三

四月

皇太后聖節

宰執親王南班百官入內上壽賜宴

皇帝初九日聖節

僧寺結制

五月重午附

士人赴殿試唱名

卷四

六月 崔真君誕辰附

七月 立秋附

七夕

解制日 中元附

八月

中秋

解開

觀潮

卷五

九月 重九附

明禋年預教習車象

明堂差五使執事官

駕出宿齋殿

五輅儀式

差官職祭及清道

駕詣景靈宮儀仗

駕回太廟宿奉神主出室

駕宿明堂齋殿行禋祀禮

明禋禮成登門放赦

郊祀年駕宿青城端誠殿行郊祀禮

卷六

十月

立冬

孟冬行朝饗禮遇明禋歲行恭謝禮

十一月冬至

十二月

除夜

卷七

杭州

卷八

大河橋道

小河橋道

西河橋道

小西河橋道

倚郭城南橋道

倚郭城北橋道

禁城九廂坊巷

大內

德壽宮

太廟

景靈宮

萬壽觀

御前宮觀

西太乙宮

夢梁錄 目錄

卷九

佑聖觀

顯應觀

四聖延祥觀

三茅寧壽觀

開元宮

龍翔宮

宗陽宮

三省樞使諫官

六部

六部監門

諸寺

秘書省國史敕令附

諸監

大宗正司

省所

六院四轄

三衙

閣職

監當諸局

諸倉

內司官

內諸司奉安

卷十

諸官舍

府治

運司衙

后戚府

諸王宮

家廟

館驛

本州倉場庫務

點檢所酒庫

安撫司酒庫

廂禁軍

防隅巡警

帥司節制軍馬

卷十一

諸山岳

嶺

諸洞

溪潭澗浦

井泉

池塘

堰閘渡

卷十二

西湖

下湖

浙江

城內外河

湖船

江海船艦

河舟

卷十三

兩赤縣市鎮

都市錢會

團行

鋪席

天曉諸人出市

夜市

諸色雜貨

卷十四

祠祭

山川神

忠節祠

仕賢祠

古神祠

土俗祠

東都隨朝祠

外郡行祠

卷十五

學校

貢院

城內外諸宮觀

城內外寺院

僧塔寺塔

古今忠烈孝義賢士墓

歷代古墓

卷十六

茶肆

酒肆

分茶酒店

麵食店

葷素從食店 諸色點心事件附

米鋪

肉鋪

醬鋪

卷十七

歷代人物

文武狀元表

武舉狀元

后妃列女

歷代方士

歷代方外僧

行孝

卷十八

民俗

戶口

物產

穀之品

絲之品

帛之品

貨之品

菜之品

果之品

竹之品

木之品

花之品

藥之品

禽之品

獸之品

蟲魚之品

免本州歲納及苗稅

免本州商稅

恩需軍民

恤貧濟老

卷十九

園囿

瓦舍

場房

夢
梁
錄
目錄

社會

閒人

僱覓人力

四司六局筵會假貨

卷二十

嫁娶

育子

妓樂

百戲伎藝

角觝

小說講經史

夢梁錄卷一

錢塘 吳自牧 撰

昭文 張海鵬 訂

正月

正月朔日謂之元旦俗呼爲新年一歲節序此爲之首官放公私僦屋錢三日士夫皆交相賀細民男女亦皆鮮服往來拜節街坊以食物動使冠梳領抹段疋花朵玩具等物沿門歌叫關撲不論貧富遊玩琳宮梵宇竟日不絕家家飲宴笑語喧譁此杭城風俗時昔侈靡之習至今不改也

元旦大朝會

元旦侵晨禁中景陽鐘罷主上精度炷天香爲蒼生祈百穀于上穹宰執百僚待班于宮門之次猶見疎星遶建章但禁門未啓而蝦蟆榔鼓並作攢點卽放魚鑰開闔門下方啓龍闈執挺人傳呼頭帽號紛然衛士雜廷紳報到闔開百僚聯轡入宮城簇擁皆從殿廡行過大朝會駕坐大慶殿有介冑長大武士四人立於殿陛之角謂之鎮殿將軍殿西廡皆列法駕兩衛儀仗龍墀立青涼傘十把效太宗朝立諸國王班次如錢武肅孟蜀王等也百官皆冠冕朝服諸州進奏吏各執方物之貢諸外國正副賀正使隨班入賀百僚執政俱于殿廊侍班而闔門催班吏高喚云那行吏進序班立畢內侍當殿厲聲問班齊未禁衛

人員隨班奏班齊。千官簪列朝儀整。已見龍章轉御屏。日表纔瞻臨玉座。連聲清蹕震班庭。上御正衙。有綠衣吏執儀劍。突趨殿前。聲諱厲不可曉。乃大璫走辦耳。宰執百僚聽名宣領班。蹈舞皆稱壽。再拜。聲傳折檻邊。禁衛人高聲嵩呼。聲甚震。名爲繞殿雷。樞密臣候稱壽畢。登殿至折檻側。百僚俱鞠躬聽制。宣制曰。履茲新慶。與卿等同朝賀畢。就殿賜燕。宰執百僚外國正副使人。次日就館賜宴。使副及三節人俱與焉。翌日至明慶靈隱等寺燒香。次至玉津御園射弓。朝家選能射武臣伴射。就園賜宴。先立招箭班。士十餘人于垛子前。使人多用弩子射。其班士裹無脚小帽子。錦襖子。踏開弩子。舞旋搭箭。過與使人。彼窺得端正。止令使人發牙。例朝廷差來伴射武臣。用弓箭中的。則得捷。上賜開裝銀鞍馬匹衣帛金銀器物有差。迎迓還舍。觀者紛然。如朝使入朝辭。賜宴餞行。仍賜馬匹銀帛禮物甚盛。三節人依例給賜而去。

立春

臨安府進春牛于禁庭。立春前一日。以旗鼓鑼吹妓樂迎春牛。往府衙前迎春館內。至日侵晨。郡守率僚佐。以綵杖鞭春。如方州儀。太史局例子禁中殿陛下。奏律管吹灰。應陽春之象。街市以花裝欄。坐乘小春牛。及春幡春勝。各相獻遺。與貴家宅舍。示豐稔之兆。宰臣以下。皆賜金銀幡勝。懸于幘頭上。入朝稱賀。

元宵

正月十五日元宵節。乃上元天官賜福之辰。昨汴京大內前縛山棚。對宣德樓。悉以綵結。山脊上皆畫羣仙故事。左右以五色綵結文殊普賢跨獅子白象。各手指內五道出水。其水用轆轤絞上燈棚高尖處。以

水櫃盛貯。逐時放下。如瀑布狀。又以草縛成龍。用青幕遮草上。密置燈燭萬盞。望之蜿蜒如雙龍飛走之狀。上御宣德樓觀燈。有牌曰宣和與民同樂。萬姓觀瞻。皆稱萬歲。今杭城元宵之際。州府設上元醮。諸獄修淨獄道場。官放公私僦屋錢三日。以寬民力。舞隊自去歲冬至日。便呈行放。遇夜。官府支散錢酒犒之。元夕之時。自十四爲始。對支所犒錢酒。十五夜。帥臣出街彈壓。遇舞隊照例特犒。街坊買賣之人。並行支錢散給。此歲歲州府科額支行。庶幾體朝廷與民同樂之意。姑以舞隊言之。如清音。遏雲。棹刀。鮑刀。胡女。劉衰。喬三教。喬迎酒。喬親事。焦鑊架兒。仕女。杵歌。諸國朝。竹馬兒。村田樂。神鬼。十齋郎。各社。不下數十。更有喬宅眷。淖龍船。踢燈。鮑老。駝象社。官巷口。蘇家巷。二十四家傀儡。衣裝鮮麗。細旦戴花朵。肩珠翠冠兒。腰肢纖鼻。宛若婦人。府第中有家樂兒童。亦各動笙篳琴瑟。清音嘹亮。最可人聽。攔街嬉耍。竟夕不眠。更兼家家燈火。處處管絃。如清河坊。蔣檢閱家。奇茶異湯。隨索隨應。點月色。大泡燈。光輝滿屋。過者莫不駐足而觀。及新開門。與牛羊司前。有內侍蔣苑使家。雖曰小小宅院。然粧點亭臺。懸掛玉柵。異巧華燈。珠簾低下。笙歌並作。遊人玩賞。不忍捨去。諸酒庫亦點燈毬。喧天鼓吹。設法大賞。妓女羣坐。諠譁勾引。風流子弟。買笑追歡。諸營班院。于法不得與夜遊。各以竹竿出燈毬于半空。遠觀若飛星。又有深坊小巷。綉額珠簾。巧製新裝。競誇華麗。公子王孫。五陵年少。更以紗籠喝道。將帶佳人美女。遍地遊賞。人都道玉漏頻催。金雞屢唱。興猶未已。甚至飲酒醺醺。倩人扶着。墮翠遺簪。難以枚舉。至十六夜收燈。舞隊方散。

車駕詣景靈宮孟慶

十六夜收燈畢。十七早五更二點。禁中催班。從駕官僚入殿起居訖。出殿門外。俱立馬于學士院。恭俟駕興。而殿東折檻下。快行家皆執金蓮燭炬。以俟登輦。駕出和寧門。詣景靈宮。行春孟朝饗禮。前後兩行絳燭燈籠。導引駕行。向有寶謨學士趙師範詩。風傳御道蹕聲清。兩道紗籠列火城。雲護帝尊天未曉。衆星環拱極星明。駕近景靈宮前。撤去黃蓋。方入宮門。此見君王虔孝之忱。至宮幄少歇。奉常更奏行禮。內侍捲簾。班導上御黃道。步至殿前。崇禮館道士二十四員。在殿墀下敝立。舉玉音法事。上登殿行禮。自西至東。步而入。待內侍下簾。先自前殿中殿。次後殿。虔恭行禮。以遵奉先思孝之家法。禮畢。外廊賜從駕官食。而後對宣。引宰臣以下入行殿。賜茶。駕還內。其親從官。皆頂毬頭大帽。紅纈錦團搭。戲獅子衫。鍍金大玉腰帶。各執骨朶。文武官皆頂雙捲脚幘頭。紅上大搭。天鵝結帶。寬衫。輦官頂雙曲脚漢頭。紅纈圓花衫。鍍金束帶。殿前班直頂兩脚屈曲幘頭。着緋結帶。望仙花衫。跨弓劍乘馬。一扎鞍轡。執纓紉前導。款數內有東三班。謂之長入。祇候幘頭。後各以青紅頭髮繫之。以表忠節之意。御龍直幘頭。一脚指天。一脚曲着。方勝纈衫。花看帶。鍍金束帶。執從物如校椅。金花唾盂。水罐。次鐸。乘壘。龍鳳掌扇。纓紉之類。及執黃羅珠子。蹙百花背座御椅子。并脚踏。快行家頂短小帽子。露半青頭巾。帶金巾。環繡體腰。紅纈衫。金束帶。懸花看帶。手執御校椅。金花瓶。獸爐。香座。御靴。纓紉。玉柱杖。小黃羅傘。御扇等物。俱搭步行。俱口鳴打打頭起之。昔諸司庫藏。各用金刻字紅牌前執。後以黃羅罩籠扛擡前導。有本庫官乘馭掌其職分。如諸司庫藏等司局。並衫帽隨號。幕士頂帽。紅羅纈衫。金帶。懸黃帛。御馬騊駼等院。亦金字紅牌呵喝。牽轡馬疋導引。親

事官各頂帽纈衫。鍍金帶。執紅紗貼金燭籠二百對。左右導行。駕將至。左右首各一員。閣門官屬乘馬執絲鞭。天武官前導引。至官寮起居亭。高聲喝曰。躬身不要拜。唱諾直身立。奏聖躬萬福。嵩呼而行。次有一員紫裳官。係閣門寄班。乘馬捧月樣綉兀子。覆於馬上。天武中官十餘。簇擁扶策而行。衆喝曰。駕頭。次以近侍諸司官。俱乘馭前後導從。三衛太尉御帶環衛。知閣內侍。都知。皆乘馭前導引。更有內等子。卽御前忠佐軍頭。引見司人員等。各頂帽。纈髮蓬鬆。着紅纈衫。兩手握拳。願望導行。或有攔駕人。捶之流血。駕近則列橫門。數十人繫鞭視從。園子三五重杏。執朶骨。諸親從等都管人員。並執骨朶列行導引。駕前有執金香座。玉斧。玉拂。及水精珠杖。迎駕。高低弄把引行。如龍弄珠也。上升平頭輦。御龍直擎黃羅雙蓋。後握雙黃羅扇。駕近太廟。則蓋撤開。前行數步。上略擡身而過。此見尊祖敬宗之意。駕後園子亦數重。衛從諸班直馬隊。從于駕後。左有宰執侍從官寮。右有親王南班。俱從行。駕後有曲柄紅綉傘。紅綉日扇。命寄班官執馭而從。次日駕再詣行後殿禮。幸太乙宮。景陽宮。行欽謁禮。其日用教樂所樂部。駕前作樂導引。駕後以鈞容直乘馬作樂而從。駕出景靈宮。至回龍橋。教樂所人員。攔駕奏致語。雜劇色打和。及奏禮成回鑾曲。快行先奏報禁中。使內侍排班迎駕起居。前人有詩曰。簾捲天街看駕回。錦身捷足走能齊。聯聲快報還宮後。扈從歸來日未西。若次日出。則後宮后妃嬪侍。皆詣景靈宮。以半帳轎儀從而行。皇太后皇后乘輿。比檐子稍增廣。花樣皆織龍。簾輿上皆立金龍。護之剪椶。妃則用金鳳。嬪好止用椶檐耳。次日或遇泥濘。委宰執分詣行事矣。

二月

二月朔謂之中和節。民間向以青囊盛百穀。瓜果子種。互相遺送。爲獻生子。禁中宮女以百草鬪戲。百官進農書。以示務本。上丁日。國學行釋奠禮。祭文宣王。以祭酒司業爲獻官。州縣學官以帥宰奉行。立春後五戊日爲社。州縣祭社稷。朝廷亦差官祭于太社。太稷壇。州府自收燈後。例子點檢酒所開支。關會二十萬貫。委官屬差吏伴雇喚工作。修飾西湖南北二山堤上亭館園圃橋道。油飾裝畫一新。栽種百花。映掩湖光景色。以便都人遊玩。

八日祠山聖誕

初八日。錢塘門外霍山路有神曰祠山正祐聖烈昭德昌福崇仁真君。慶十一日誕聖之辰。祖廟在廣德軍。敕賜廟額廣惠。自梁至宋。血食已一千三百餘年矣。凡邦國有禱。士民有告。感通卽應。其日都城內外詣廟獻送。繁盛最是府第及內官迎獻馬社儀仗整肅。粧束華麗。又有七寶行排列數卓珍異寶器珠玉殿亭。悉皆精巧。後苑諸作呈獻盤龍走鳳。精細靴鞋。諸色巾帽。獻貢不俗。各以綵旗鼓吹妓樂舞隊等社。奇花異果。珍禽水族。精巧面作。諸色鎗石車駕迎引。歌叫賣聲。效京師故體。風流錦體。它處所無。臺閣巍峩。神鬼威勇。並呈于露臺之上。自早至暮。觀者紛紛。十一日。廟中有衙前樂。教樂所人員。部領諸色樂部。詣殿作樂呈獻。命大官排食果二十四盞。各齎呈藝。守臣委佐官代拜。初八日。西湖畫舫。盡開蘇隄。遊人來往如蟻。其日龍舟六隻。戲於湖中。其舟俱裝十太尉。七聖。二郎神神鬼。快行錦體。浪子黃胖。難以鮮色。